

DOMINGU I ADVENTU – TINAN B

Tema

Liturjia Domingu I Adventu nian konvida ita atu haree ita-nia dalan iha istória iha serteza katak “Na’i mai”. Liturjia apresenta mós infdikasaun konkreta kona-ba forma moris iha tempu hein nian.

Leitura dahuluk apelu dramátiku ida ba Jahwéh, Maromak “aman” no “makso’ik”, iha sentidu katak mai dala ida tan hasoru Israel atu liberta nia husi salan no atu hafoun Povu ida ho fuan foun. Profeta la iha dúvida: Maromak nia esénsia mak domin laran-sadia; Maromak nia “kualidade” mak garantia ninia intervensaun salvadora iha ain-hakat hotu Maromak nia Povu nian.

Evanjellu konvida dixípulu sira atu enfrenta istória ho korajen, determinasaun no esperansa, iha serteza katak “Na’i mai”. Ni ahanorin tan, katak tempu hein mak tempu ida “vijilánsia” nian” – katak, tempu ida kompromisu ativu no efetivu ho konstrusaun Reinu nian.

Leitura daruak hatudu Maromak prezente iha istória no iha comunidade fiar-na’in nia moris, liuhusi don no karimza sira ne’ebé ho gratuidade nia haraik ba Ninia Povu. Leitura mós husu fiar-na’in sira atu mantein atentu no vijilante, atu simu Maromak nia don sira.

LEITURA I – Is 63,16b-17.19b; 64,2b-7

Iha kapitulu 56-66 Livru Isafás nian, tuir konvensaun hanaran “Trito-Isaías”, ho testu oioin ne’ebé nia fonte la hanesan... Ba ema balun, nia mak testu profeta anónimu ida, pós-ezílíku, ne’ebé hala’o ninia ministériu iha Jerusalém bainhira fila hikas husi Babilónia, iha tinan sira 537/520 mK; ba maioria, testu ne’e mai husi autór oioin pós-ezílíku ne’ebé haketek iha tempu naruk ida (provavelmente, entre sék. VI no V mK).

Ita iha époka liutiha Ezíliu no iha Jerusalém ne’ebé hala’o hela rekonstrusaun... Fatuk sira ne’ebé monu fó hanoin drama tempu uluk nian, populasaun uitoan, rekonstursaun neineik tanba populasaun kiak, inimigu sira hafuhu hela. Populasaun dezanima no lahó esperansa... Husi dezánimu mosu indiferensa ba Jahwéh no Aliansa. Nune’e, la tau interese ba kultu no Maromak okupa fatin sekundáriu iha Povu nia fuan no preokupasaun sira.

Profeta sira ne’ebé dezenvolve misaun iha faze ne’e buka fanun esperansa iha futuro ida moris nakonu no salvasaun definitiva nian (Jerusalém sei sai hilas sidade furak no hakmatek no Maromak sei horik iha Povu nia leet); maibé sira la husik atu subliña katka Povu tenke nakfilak ba dalan Aliansa nian, justisa nian, domin nian fidelidade nian ba Jahwéh.

Testu ne’ebé ohin propoin mai ita mak parte perikopa ida husi 63,7 to’o 64,11. Períkopa ne’e nia versíkulu sira la iha unidade no orden, iha-ne’ebé kahur elementu típiku lamentasaun nian ho elementu konfisaun salan nian. Situasaun mak desgrasa nasional ida. Povu dirije ba Maromak istória nian, hodi husu atu NI aintervein atu so’i; no desgrasa ba sira mak kastigu ba salan sira, Povu konfesa nia salan no husu perdaun.

MENSAJEN

Ita-nia testu mak forma orasaun ida ne’ebé profeta dirije ba Jahwéh. Maromak iha testu ne’e mak “aman” no “makso’ik”. Títulu “aman” nian (karik mai husi kultura kananeu, ne’ebé konsidera maromak prisnipál panteun nian nu’udar “aman” tanba hala’o funsaun protesau

no na'in nian) mai husi Maromak nia asaun protetora no makso'ik ba ninia Povu, iha istória. Títulu “makso'ik” (“goel”) iha antigu direitu israelita, rezerva ba parente besik liu, ne'ebé iha knaar atu defende ninia maluk sira, atu mantein patrimóniu familiár (kf. Lv 25,23-24), atu liberta familiár id amonu iha moris-atan (kf. Lv 25,26-49), atu proteje feto-faluk (kf. Rut 4,5) eh vinga parente ida ema oho (kf. Nm 25,19-20). Ho títulu ne'e, autór fó hanoin ba Maromak ninia responsabilidade sira enkuantu protetór, defensór no makso'ik Povu nian.

Situasaun ida-ne'ebé mak “ezije” Maromak nia asaun makso'ik no libertadora ba nia Povu? Profeta hakarak atu Maromak – “aman” no “makso'ik” Israel nian – la husik Povu kontinua atu sai fuan toos no hadook an husi dalan Aliansa nian. Ne'e mak invokasaun dramátika ida, ne'ebé iha objetivu atu obriga Maromak nia intervensaun libertadora. Problema mak “jerasaun ne'e” (foin fila husi Eziliu) la rekoñese salan no kontinua moris iha salan, iha infidelidade, iha injustisa, iha indiferensa hasoru Maromak no ninia proposta sira.

Profeta iha konviksaun katak Povu bele muda, Maibé ni amós konxiente katak Povu mesak, la iha kbiit atu sai husi toman salan no infidelidade nian. Iha kontestu ne'e mak Maromak tenke asume ninia responsabilidade sira Aman no makso'ik nian no “tuun” atu muda nia Povu nia fuan.

Loloos, Jahwéh hatudu An dala barak iha istória no oferese nafatin salvasaun ba nia Povu. Israel konxiente kona-ba ne'e; no iha “memória” istórika mak esperansa hetan fundamentu: Maromak nafatin “aman” no “makso'ik” Israel nian, konserteza kontinua sai dala ida tan iha situasaun dramátika atuál.

Ita-nia testu remata ho ilas ida furak liu: Maromak mak “badae-tahu” no nia Povu mak tahu ne'ebé artista modela ho domin no kuidadu. Ilas ne'e hatudu Maromak nu'udar na'in ne'ebé iha kbiit atu modela ninia Povu tuir ninia hakaran; maibé, provavelmente, nia móa aluzaun ida kona-ba sá mak profeta hein husi Maromak: kriasaun foun ida. Ilas lori ita ba Gn 2,7 no ba kriasaun ema nian husi tahu... Profeta hakarak sujere katak Maromak nia intervensaun makso'ik mak kriasaun foun ida, no husi nia moris umanidade foun.

LEITURA II – 1 Cor 1,3-9

Iha ninia viajem misionária daruak, Paulo to'o iha Corinto, depoizde hakat Grésia, no hela iha ne'ebá ba fulan 18 (tinan 50-52). Tuir Apóst 18,2-4, Paulo hahú serbisu iha Priscila no Áquilan nia uma, kazál judeu-sarani ida. Iha sábadu, nia haklaken iha sinagoga. Ho Silvano no Timóteo ne'ebé to'o iha Corinto (2 Cor 1,19; Apóst 18,5), Paulo konsagra an tomak ba haklaken Evanjellu. Maibé lakleur de'i tmosu konfliktu ho judeu sira no duni sai nia husi sinagoga.

Corinto mak sidade foun no próspera liu. Iha portu rua tasi nian, ho karakterístika típika sidade marítima nian: populasaun husi rasa no relijiaun hotu. Ne'e mak sidade ida iha-ne'ebé mariñeiru sira ne'ebé kruza Mediterráneu mai buka prazér, depoizde fulan barak iha tasi laran. Iha Paulo nia tempu, sidade iha makhotik 500.000, no populasaun lubuk ida moris nu'udar atan. Ema uitoan nia rikusoin kontrasta ho ema maioria nia moris-mukit.

Nu'udar rezultadu ba Paulo nia pregasaun, moris comunidade sarani Corinto nian. Membru maioria orijen grega, maski ema husi kondisaun kiak (kf. 1 Cor 11,26-29; 8,7; 10,14.20; 12,2); maibé mós iha elementu husi orijen ebraika (kf. Apóst 18,8; 1 Cor 1,22-24; 10,32; 12,13).

Komunidade mak comunidade ida moris no larna-manas; maski nune'e, sira moris iha perigu ambiente korrutu ida nia laran: la iha morál dissoluta (kf. 1 Cor 6,12-20; 5,1-2), gossip, istori-malu, funu malu (kf. 1 Cor 1,11-12), babeur husi sabedoria filozófika orijen jentiu nian ne'ebé tama iha Kreda ho vernís sarani superfíial ida (kf. 1 Cor 1,19-2,10).

Komunidade Corinto iha possibilidade di'ak, maibé tau abut iha rai inimigu nian. Iha komunidade Corinto nian, ita haree difikuldade fiar sarani nian atu integra an iha ambiente inimigu nian, marka ho kultura jentiu no ho valór sira ne'ebé kontráriu ho mensajen Evanjellu nian.

Testu ne'ebé ohin propoin mai ita mak “agradesimentu” insiál. Baibain, Paulo hahú nia surat sira ho “agradesimentu”.

MENSAJEN

Iha “agradesimentu”, iha klima orasaun no hahí nian, Paulo agradece Maromak na realidade konkreta sira ne'ebé halo parte ba komunidade sarani Corinto nia moris, no tempu hanesan antisipa tema sira ne'ebé nia sei desenvolve iha surat. Testu ne'e nakonu ho teolojia.

Iha testu ne'e iha aspetu rua ne'ebé, tanba ninia signifikadu no importánsia, konvein tau iha relevu: dahuluk kona-ba don sira ne'ebé komunidade simu husi Maromak, liuhusi Jezús Kristu; daruak, kona-ba finalidade bolun ne'ebé sarani Corinto nian simu.

Uluknanai, Paulo hatene didi'ak katak komunidade Corinto simu “don sira” husi Maromak (vers. 4-6). Ba dala uluk mak iha Paulo nia surat sira mosi liafuan “karizma” (vers. 7) – liafuan ne'ebé define don sira mai husi laran-luak Maromak nian no fó ba ema ruma ba komunidade nia di'ak. Komunidade Corinto nian mak komunidade ida Maromak hadomi, nakonu ho “karizma” sira tan Maromak nia laran-luak. Di'ak tebes ba Corinto oan sira atu iha konxiénsia kona-ba Maromak nia laran-luak no agradece Nia. Iha 1 Cor 12-14), Paulo desenvolve ninia katekeze kona-ba “karizma sira”.

Sá loos “karizma” sira ne'e? Paulo temi liafuan (“lógos”) mo koñesimentu (“gnosis”) nu'udar komponente prinsipál rikusoin espirituál sira ne'ebé Maromak haraik ba Corinto oan sira. Ne'e tema importante liu iha kontestu kultura grega nian, ne'ebé iha ne'e apresenta nu'udar don Maromak nian. Hodi halo nune'e, Paulo buka anima atu Corinto oan sira buka ho laran-manas “sabedoria” maibé, hodi fó signifikadu no enkuadramentu kristaun. Paulo desenvolve kestaun ne'e iha kapitulu sira tuirmai hodi dehan katak Maromak nia “sabedoria” dala barak la koinside ho ema sira nia “sabedoria” (kf. 1 Cor 2,1-16).

Iha fatin daruak, Paulo manifesta ninia konviksaun katak “karizma sira” ne'ebé Maromak hakonu Corinto oan sira atu harii komunidade ne'ebé orienta an ba Jezús Kristu, ho kbiit atu moris ho forma ireprensivel ninia kompromisu ho Evanjellu to'o loron enkontru finál no definitivu ho Kristu. Ba objetivu finál enkontur no komuñau total ho Maromak ida-ne'e mak komunidade, hodi Jezús Kristu nia kbiit no liuhusi apoiu simu husi Maromak nia don sira mak nia tenke la'o.

EVANJELLU – Mc 13,33-37

Testu ne'ebé ohin propoin mai ita lori ita ba Jerusalém, molok Jezús nia Terus no Mate. Loron datoluk Jezús hela iha Jerusalém, loron “ensinamentu sira-nian” no polémika radikál liu ho líder judaiku sira (kf. Mc 11,20-13,1-2). Iha loron ne'e nia rohan, iha “Jardín Oliveira nian”, Jezús oferese ba grupu ida dixípulu sira nian (Pedro, Tiago, João no André – kf. Mc 13,3) hanorin luan no enigmátiku ida, ne'ebé koñesidu ho naran “diskursu eskatológiku” (kf. Mt 13,3-37).

Maioria esduda-na'in sira Evanjellu Marcos nian konsidera diskursu ne'e nu'udar linguajen profétiku-apokalíptika, deskreve misaun komunidade sarani nian iha período husi Jezús nia mate to'o istória umana nia rohan. Tetsu ne'e testu difisil ida, ne'ebé uza ilas no linguajen ida marka ho aluzaun enigmátika, ho jéneru literáriu “apokalipse” nian. La'ós reportajen jornalista akontesimentu konkretu sira-nian, maibé leitura profétika istória umana nian. Ni

aobjetivu mak fó indikasaun sira kona-ba atitude sira tenke foti hasoru mudansa sira ne'ebé sei marka comunidade nia dalan iha istória, to'ó Jezús nia loron ikus atu mai hodi instaura, ho modu definitivu lalehan no rai foun.

Dixípulu sira refere iha inísiu “diskursu eskatolójiku” representa comunidade sarani tempu hotu nian... Sira na'in haat, sai representante dixípulu sira futuru nian. Jezús nnia mnsajen destina ba comunidade fiar-na'in tomak atu la'ó hodi fihir ba enkontru finál ho Jezús no ho Aman Maromak.

Misaun ne'ebé Jezús entrega ba comunidade la'ós misaun fasil ida... Jezús konxiente katak dixípulu sira tenke enfrenta difikuldade sira, persegisaun sira, tentasaun sira ne'ebé “mundu” sei tau iha sira nia dalan. Komunitade ne'ebé la'ó iha istória sei presiza estímulo no korajen. Tanba ne'e mak Nia halo apelu ba fidelidade, korajen, vijilánsia... Iha dalan nia rohan, eskolante sira sei hasoru Jezús.

“Diskursu eskatolójiku” fahe ba parte tolu, hahú ho introdusaun ida (kf. Mc 13,1-4). Iha parte dahuluk (kf. Mc 13,5-23), diskursu fó sai akontesimentu oioin ne'ebé marka istória no husu atitude loos hus dixípulu sira: vijilánsia no neon-na'in. Iha parte daruak, diskursu fó sai Mane Makso'ik nia vinda definitiva no mundu foun ne'ebé sei mosu (kf. Mc 13,24-27). Iha parte datoluk, diskurso fó sai inserteza “tempu” istóriu eventu sira nian no insiste ho eskolante sira atu sai nafatin vijilante no prepara an atu simu Na'i ne'ebé mai (kf. Mc 13,28-37).

MENSAJEN

Ita-nia testu integra iha parte datoluk diskursu eskatolójiku nian. Nia refere direktamente ba tempu ikus no ba atitude ne'ebé dixípulu sira tenke iha hasoru enkontru ikus no definitivu ho Jezús. Nia objetivu mak forma no halo sira iha kbiit atu enfrenta istória ho determinasaun no esperansa.

Evanjellu domingu ne'e nian hahú ho aikanoik ida – ema ida ne'ebé ba viajem dook no fahe knaar ba atan sira no haruka porteiru atu hein (kf. Mc 13,33-34) – no remata hodi fó hanoin kona-ba atitude loos atu hein Na'i (kf. Mc 13,35-37). Jezús nia objetivu mak fó hanoin atu rai no hafunan rikusoin sira ne'ebé Jezús konfia ba eskolante sira molok Nia fila ba Aman.

“Uma-na'in” aikanoik nian mak Jezús. Hodi husik mundu ne'e atu fila ba Aman, Nia konfia ba eskolante sira knaar atu harii “Reinu” no halo sai realidade mundu ida harii ho valór sira Reinu nian. Dixípulu sira Jezús nian labele tuur hodi hein ho hakmatek Na'i; sira iha misaun ida – misaun ida Jezús rasik entrega atu halo sai konkretu, maski ho kondisaun kontráriu. Ita labele haluha buat ne'e: ita-nia hein la'ós hein ida pasivu, maibé hein ne'ebé ativu, hodi implika kompromisu efetivu ho konstrusaun mundu ida umanu liután, fraternu liután, justu liután, evanjéliku liután.

Sé mak “porteiru”, ho knaar spesiál vijilánsia nian (vers. 34)? Iha Marcos nia perspetiva, “porteiru” mak ema ne'ebé iha responsabilidade spesiál iha comunidade sarani... Ninia misaun mak impede atu valór ne'ebé la'ós Evanjellu nian invade comunidade no dinámika Reinu nian. Figura “porteiru” nian mak responsavel sira comunidade sarani nian, ne'ebé iha misaun vijilánsia no animasaun comunidade nian. Sira tenke tulun comunidade atu dixerne ho modu permanente, valór sira ne'ebé mundu iha, hodi haree buat ne'ebé comunidade bele eh labele aseita atu moris iha fidelidade ativa ba Jezús no ba Ninia proposta sira.

Hotu-hotu – “porteiru” no “Na'i” nia atan sira – tenke sai ativu no vijilante. Liafuan-xave Evanjellu loron ne'e nian mak: “vijilánsia”. Maski nune'e, “vijilánsia” la signifika moris iha istóri ania ninin, hanesan anju no dook husi mundu, hodi evita kompromete an atu la hafoer an ho realidade sira mundu nian; maibé nia tenke haka'as an atu harii Reinu, loron ba loron, hodi realiza ho fidelidade knaar ne'ebé Na'i entrega ba nia. Knaar sira-ne'e liu husi

kompromisu efetivu ho konstrusaun mundu foun, mundu ida ne'ebé moris ba beibeik tuir Maromak nia projetu sira.

Ita-nia testu asegura dixípulu sira, ne'ebé la'õ iha mundu, katak objetivu finál istória umana no enkontru definitivu no libertadór ho Jezús. “Na’i mai” – Jezús rasik grante; no serteza ne’e tenke anima no fó esperansa ba dixípulu sira, liuliu iha momentu krize no konfuzaun nian. Eskolante sira la bele lakon esperansa, maski buat hotu rahun iha sira nia sori-sorin, hodi haree borus husi estrutura tuan sira ne'ebé monu, realidade mundu foun ne'ebé moris daudaun.

Saida mak eskolante sira tenke halo, bainhira hein atu mundu definitivu foun mosu mai? Sira ho korajen no persevernasa, tenke fó sira-nia kontributu ba edifikasaun “Reinu” nian, hodi sai manu-ain dame, justisa, domin, perdaun, fraternidade nian, no kumpre misaun ne'ebé Jezús entrega.